

Urtarrilaren 1ean **JAINKOAREN AMA MARIA SANTUAREN FESTABURUA**

Agurra

Errukiaren eta bakearen Jainkoa izan bedi zuekin.

Sarrerako Oharpena

Jainkoaren Ama Maria Santuaren festaburua dugu gaur, Eguberri-zortzigarren honetan. "Jainkoaren Ama" aitrotzen dugu Maria, berarengan gizon egin baitzen Jainkoaren Hitza.

Urteko lehen egun honetan Mariaren Seme Jesusi, Bakearen Erregeari, eska diezaiogun iritsi dadila lurreko bazter guztietara bere jaiotzaz munduari ekarri dion egiazko bakea.

Damu-otoitza

Urte berri egunez iturrira joan eta ur berria hartzea ohitura zaharra zen gure herrietan. Has daiteke gaurko meza (damu-otoitza utzita) ura bedeinkatuz eta herria urez zirtatuz. (Ikus bedeinkapen otoitza liburuxka honetan 103. orrialdean).

Ospakizunaren hasieran eska dezagun bekaturen barkamena, misterio santuak ospatzeko gai izan gaitezen.

V/. Erruki, Jauna. **R/.** Bekatu egin dugu-ta.

V/. Agertu guri, Jauna, zeure bihotz ona. **R/.** Eta salba gaitzazu.

Erruki dakigula Jainko guztiz ahaltsua, eta, gure bekatuak barkaturik, eraman gaitzala betiko bizitzara.

V/. Erruki, Jauna. **R/.** Erruki, Jauna.

V/. Kristo, erruki. **R/.** Kristo, erruki.

V/. Erruki, Jauna. **R/.** Erruki, Jauna.

Aintza

Bat egin dezagun zeruko nahiz lurreko senide guztiekin, Jainkoa bihotz-bihotzez goratzeko.

Otoitza

**Jainko Jauna, Maria Birjina Ama eginez
betiko salbamera eman diozu gizakiari;
iguzu, biziaren iturria den
Jesu Kristo zure Semea ekarri diguna,
laguntzaile ere izan dezagula zure aurrean.
Zure Seme Jesu Kristo gure Jaunaren bitartez,
Zurekin eta Espiritu Santurekin batean
Jainko eta errege bizi baita gizaldi eta gizaldietan.**

Hitzaren liturgiari oharpena

Biblia, bere osotasunean harturik, Jainkoak bere herriarekin izan duen historia da: maitasun historia, bedeinkapen eta salbamen historia. Horixe entzungo dugu gaur ere: Jaunak gure alde ari da, Jauna gurekin da beti gu salbatzen eta gu bedeinkatzen.

Lehenengo irakurgaia (Zen 6, 22-27)

Zenbakien liburutik

Jauna honela mintzatu zitzaion Moisesi: «Hitz egiozu Aaroni eta haren seme-alabei, eta esan: Honela bedeinkatuko dituzue israeldarrak: "Bedeinka zaitzala Jaunak, eta zaindu. Ager diezazula Jaunak bere aurpegi argia, eta erruki dadila zutaz. Ager diezazula Jaunak bere aurpegia, eta eman bere bakea". Honela aipatuko dute nire izena israeldarren gainean, eta Nik bedeinkatuko ditut».

Erantzun-salmoa (*Sal* 66. 2-3. 5. 6 eta 8)

A-ger - tu zu - re bi- hotz o - na. E-man, Zuk, Jau -
na, o - sa - su - na.

Erruki bekigu Jainkoa, bedeinka gaitzala,
ager diezagula aurpegi alai;
ezagutu dezaten lurrean zure bidea,
herri guztietan Zugandiko sal**ba**mena. R/.

Poztu bitez kantari atzerriak,
zuzenbidez baitaramazu izadia;
zintzo baitituzu gidatzen herriak,
eta zaintzen lurrean atzerriak. R/.

Ene Jainko, ospa zaitzate herriek,
ospa zaitzate herri guztiek.
Jainkoak bedeinka gaitzala,
lur bazter guztiek beldur digtela. R/.

Bigarren irakurgaia (*Ga* 4, 4-7)

San Paulo Apostoluak Galaziarrei

Senideok: Garaia bete zenean, bere Semea bidali zuen Jaungoikoak, emakumeagandik jaioa, Legepeko egina, Legepean zeudenak eroatera, guk seme-ordetza har genezan. Eta seme-alaba zaretelako, bere Semearen Espiritua bidali du Jaungoikoak zuen bihotzetara, «Abba! Aita!» deika ari dena. Beraz, gehiago ez zara morroi, seme baizik; eta seme bazara, baita oinordeko ere, Jainkoari esker.

Aleluia (*Hb 1, 1-2*)

A - le-lu - ia, a - le-lu - ia, a - le-lu - ia, a - le-lu - ia.

Askotan eta era askotara
 hitz egin zien Jaungoikoak Profeten bidez ‘
 aspalditik gure arbasoei;
 eta azkenak diren egun hauetan,
 Semearen bidez hitz egin digu. R/.

Ebanjelioa (*Lk 2, 16-21*)**Homiliarako argibideak**

Urtea ondo hasi

Gaurko ospakizunari “berri ona” dario alde guztietatik: Eguberri zortzigarrena dugu gaur, oraindik Jesusen Jaiotza bizi-bizi ospatzen ari garelarik. Zailtasunak ugari dituen gure munduaren erdian beharrezkoa zaigu “Jainkoa-gurekin” dela aitortuz eta gure bizitzarako bere bedeinkapena eskatuz urte hastea.

Itun Zaharreko apaizek (lehenengo irakurgaian ikusi dugu) herria bedeinkatzen zuten Jainkoaren izenean «ager diezazula aurpegi argia... eman diezazula bere bakea» esanez; bedeinkatuagoak gara gu, Semea bete betean eman baitigu Jainkoak. Halaxe iragarri zuten aingeruek: «aintza zeruetan Jainkoari eta bakea lurrean haren gogoko gizakiei».

Merezi du ospakizunaren bukaeran hartuko dugun bedeinkapen berezia gogoan izatea: «Bedeinkapen guztien iturri den Jainkoak

eman diezazuela bere grazia... eta urte guztian bizirik eta osasunez gorde zaitzatela... Berak egin zaitzatela sinesmenean sendo, itxaropenean zintzo, eta bizitzako gorabeheretan maitasunean iraunkor azkeneraino... urte berri honetan zuen egunak eta lanak bere bakean era ditzala, zuen eskariak nonahi eta beti entzun eta eraman zaitzatela betiko bizitzara».

Zer hoberik opa diezaiokegu elkar? Dena beharko dugu datozen hamabi hilabeteetan.

Jesus ezarri zioten izen, hau da, «Jainkoak salbatu egiten du»

Oraindik Eguberri da. Jainkoa gugana gerturatu da gure historian haragi hartzean.

Jarri zioten izena Jesus izan zen. Horrek «Jainkoak salbatu egiten du» esan nahi du hebraeraz: horixe da Mesiasi jarri ziezaioketen izen esanguratsuen, Jainkoa-gurekin dela esatearen antzekoa.

Jainkoa gure historian barneratu da, era betean eta betiko. Horixe da Eguberriaren misterio oinarrizkoa. Jainkoak historian parte hartuz salbatzen gaitu bere Semearen bidez. Salbamen hori hasi da dagoeneko eta bere betera iritsiko da: «gaur salbamenaren hasierak pozten gaituenok egunen batean salbamen horren bete iritsi dezagun» (oparien gaineko otoitza).

Seme-alaba gara

Halaxe esan digu Paulok: «Semea bidali zuen Jaungoikoak, guk seme-ordetza har genezan».

Ez gara izaki hutsak, are gutxiago esklabuak. Jainkoaren Semea gure senide egin da, gu Jainkoaren familiako izan gaitezten, «beraz gehiago ez zara morroi, seme baizik» Kristorekin batera. Eta horregatik, Jesus bera eragiten zuen Espirituak eraginik, guk ere esan dezakegu egiaz "Abba, Aita".

Egiaz seme-alaba sentitzea elkarren senide izatea da. Elkarren kezka eta ardura izatea. Zailtasunak gainditzen saiatuz, elkarri bidean lagunduz. Gizon egin zen Jainkoaren misterioa elkarri eskura jarritz. Jainkoa gurekin den bezala gu elkarrekin izanez. Elkarren axola gehiagorekin bizitzeak bake-bidean jar gaitzake. Horixe eskatuko diogu Andre Mariari egun honetan.

Santa Maria, Ama

Abendualdia eta Eguberrialdia Andre Maria presente edukitzeko garaia dira, Jesusen gizon egitean, jaiotzan eta agerkundean toki berezia baitu berak. Ez guk hala nahi dugulako, Jainkoak berak bizitzaren hasieratik gurutze ondora eta Pazkotik Espirituaren etorrerara Maria Jesusen ondoan jarri zuelako baizik.

Baina gaur era berezian gogoratzen dugu Maria: «berak salbamen misterioan izan zuen partehartzea ospatzen dugu eta berak duen garrantzia berezia azpimarratzen dugu, beraren bidez jaso baikeuen biziaren Iturria» (Paulo VI, Marialis Cultus).

Pozik aitortzen dugu «Maria Birjina ama eginez, betiko salbamena eman diola Jainkoak gizakiari» eta beraren bidez hartu dugula «biziaren iturria den Jesu Kristo» (kolekta otoitza). Jaunartze ondorengo otoitzean azaltzen da Paulo VI.ak Mariari jarritako izen berria: «Elizan Ama», gaur pozkarioz aitortzen duguna.

Maria da itxaropenaren eredia, harrera onaren eta Mesias mundura etortzearen laguntzailea. Berak inork ez bezala bizi zituen Abendualdia, Eguberria eta Jaunaren Agerkundera. Horregatik, Jesusekin batera bera oroitzeak lagundu egiten digu aldi hau egoki bizi eta urtea ondo hasten.

Jainkoaren herriaren otoitza

Senideok: zuzen diezaiozun gure otoitza Jaunari, eta Bere Semearen Ama bitarteko dugula eska dezagun bere errukia gizaki guztientzat:

Erantzuna: **Erakuts guri, Jauna, zure bihotza ona.**



- Fededun guztiek, Mariaren antzera bihotzean gorde eta hausnar dezaten Jainkoaren Semeaz entzuna, gero gartsu hots egiteko.
- Herrialde eta arraza guztietako gizon eta emakumeak, guztion Aita den Jainko bakarra aitortuz elkarren senide bezala bizi daitezen.
- Gerra eta injustizia, zapalketa eta gosea nozitzen duten herrian deia Jaunarengana iritsirik ahal bezain laster egiazko bakera eta elkarbizitzara iritsi daitezen.
- Urte berriaren hasiera Jainkoari eskaintzera hemen bildu garenok, bizi ditzagula bakez urte honen egun guztiak eta osasun eta alaitasunez bukaerara hel gaitezen.

Betiereko Jainko Jauna entzun gure otoitzak eta bedeinka ezazu hasiera goazen urte berri hau: gure eguneroko lanak eman diezagula eguneroko ogia eta gure bihotzek aurki dezatela zure Hitzarengan asebeteko dituen eta ongiaren bidetik eramango dituen egiazko janaria. Jesu Kristo gure Jaunaren bitartez.

Eukaristiaren liturgiari oharpena

Andre Mariaren errai errukitsuek eraman zuten eta mundura ekarri Salbatzailea, Mesias Jauna, Espirituaren indarra bitarteko. Errukiaren Espiritu bera eskatuko dugu orain, elkarrekin otoitz eginez.

Prefazioa: Andre Mariaren I. Prefazioa. (*Meza-liburuan, 364. or.*)

«Eta Zu bedeinkatzea eta gorestea, Maria beti Birjina dohatsuaren amatasuna ospatzen dugun egun honetan».

Jaunartze-ondorengo otoitza

**Pozik hartu ditugu, Jauna, zeruko sakramentuak;
 balia bekizkigu betiko bizitzarako,
 Maria Birjina Jaungoikoaren eta Elizaren Ama
 aitortzen dugunoi.
 Jesu Kristo gure Jaunaren bitartez.**

Bedeinkapen Nagusia

Jauna zuekin. R/. Eta zure espirituarekin.

Makur zaitetze, Jaunaren bedeinkapena hartzeko.

(Eskuak herriaren gain zabalik bedeinkapena esango du:)

**Bedeinkapen guztien iturri den Jainkoak
 eman diezazuela bere grazia,
 isur dezala zuen gainera bere bedeinkapen ugaria
 eta urte guztian bizirik eta osasunez gorde zaitzatela. R/. Amen.**

**Berak egin zaitzatela sinesmenean sendo,
 itxaropenean zintzo,
 eta bizitzako gorabeheretan
 maitasunean iraunkor azkeneraino. R/. Amen.**

**Urte berri honetan
 zuen egunak eta lanak bere bakean era ditzala,
 zuen eskariak nonahi eta beti entzun
 eta eraman zaitzatela betiko bizitzara. R/. Amen.**

**Bedeinka zaitzatela Jainko ahalguztidunak:
 Aitak, eta Semeak, + eta Espiritu Santuak. R/. Amen.**

Zoazte Jaunaren bakean. R/. Eskerrak Jainkoari.